

Predigt zur Konfirmation am 6. April 2025 in Läuelfingen

Mk 4

35 Und er sagt zu ihnen am Abend dieses Tages: Lasst uns ans andere Ufer fahren.

36 Und sie liessen das Volk gehen und nahmen ihn, wie er war, im Boot mit. Auch andere Boote waren bei ihm.

37 Da erhob sich ein heftiger Sturmwind, und die Wellen schlugen ins Boot, und das Boot hatte sich schon mit Wasser gefüllt.

38 Er aber lag schlafend hinten im Boot auf dem Kissen. Und sie wecken ihn und sagen zu ihm: Meister, kümmert es dich nicht, dass wir untergehen?

39 Da stand er auf, schrie den Wind an und sprach zum See: Schweig, verstumme! Und der Wind legte sich, und es trat eine grosse Windstille ein.

40 Und er sagte zu ihnen: Was seid ihr so furchtsam? Habt ihr noch keinen Glauben?

41 Und sie gerieten in grosse Furcht, und sie sagten zueinander: Wer ist denn dieser, dass ihm selbst Wind und Wellen gehorchen?

Liebi Konfgmeind

**Wenn i mr öppis dörfti wünsche im Blick uf das
was ihr im Konfirmations- und im Religionsunterricht erlebt
händ
uf em Weg bis dohi
em fiirliche Abschluss devo**

denn wär's,
 dass ihr chönd säge:
 um das, wo's do ihr Gschicht goht
 isch's au im Konf gange.

Z'erschit meini demit s'Bild
 wie alli im gliiche Boot sitze.

Ich halte das för es ganz wichtigs Bild.

Alli sitze'mr im gliiche Boot.

In dr Gschicht sind's 13 Männer.
 Si kenne sich no nid würklich.
 Nume Simon Petrus und Andreas
 Und Jakobus und Johannes sind Brüedere
 Aber sus isch es e zämmegwürfleti Schar
 wo erschit sit churzem zämme unterwegs isch mitenand,
 ganz verschieden Type und Charaktere.
 Si händ sich gegesiitig nid usgsuecht
 sondern Jesus hät si usgsuecht.

Und jetz sind si zämme im gliiche Boot.

Das isch im Chliine es Bild för s'grosse Ganze.

1968 hat dr NASA Astronaut William Anders
 vo 780 km Entfernig us
 d'Erde fotografiert.
Earthrise hät er sis Bild gnennt '*Erdufgang*'

Das Bild hät d'Sicht vor Menschheit uf üsere Planet grundlegend verändertet.

Me hät gseh,

wie eigetlich winzig d'Erde isch im All

so winzig, wie es Boot ufem See Genezareth.

Und s'isch vilne wie Schuppe vo de Auge gfalle:

Mr sitze als Erdebürger :inne alli im gliiche Boot

So verschiede mr au sind.

Dr See Genezareth isch en wunderbare See

wenn er in dr Morgesunne glitzeret

und chliini Welle ganz sanft ans Ufer rolle

und beruigend plätschere.

Denn isch's en richtig friedliche Ort.

Aber weg de grosse Temperaturunterschied zwüschet Wasser

und Land chunnts gege Obig immer wieder zu heftige

Wirbelsturm ufem See.

Ir Gschicht isch es Obig, wo di 13 Manne ins gliiche Boot stiige.

Si sind in dem Boot

zwüschet ruig und friedlich dahin plätscherndem Wasser

und ufpeitschte, gföhrliche Welle.

Das wird mr zum Bild för s'Lebe überhaupt.

för üseri wunderbari Welt

mit ihrne unglaubliche Möglichkeite und Chance

mit ihrer Schönheit und Pracht

Und andersiits stoht di ufpeitschti See för alles

wo üs Angscht macht.

Ich gseh Euch,

liebi Konfirmandinne und Konfirmande
 jungi Mensche mit so viel Begobige und Fähigkeite
 mit Wünsch und Hoffnige,
 und ich gseh e grossartigi Welt, wo euch offe stoht.
 Und ich gseh Bedrohige und Useforderige
 wo en Wirbelsturm mit Welle, wo ins Boot schlönd,
 gar nid so es schlechts Bild isch defür.

Wenn-i gsait han
 ich würdi mir wünsche,
 dass ir realisierid
 um das, was es do ir Gschicht goht
 isch's au im ganze Konfunterricht mit em Lager und Weekend
 und allem drum dra gange,
 denn meini demit z'erscht emol s'Gemeinschaftliche:
 ebe
 mr sitze im gliiche Boot.

Es isch öppis Chliises
 z'vesueche als Konfgruppe,
 mitenand e Stück Weg z'goh
 so verschiede mr sind.
 Z'luege druf
 dass niemert uf dr Strecki bliibt
 z'achte druf, dass me denand nid z'fescht ufe Wecker goht,
 dass niemert plogt wird
 dass me mengisch richtig Spass hät zäme
 dass me sich versuecht z'verstoh
 und dass es mengisch äfach fegt mitenand
 meh und andersch als allei vor em Bildschirm.

Das isch öppis Chliises.

Aber in dem chliine steckt öppis Grosses,
 nämlich d'Erfahrig
 dass es e besseri Alternative git
 als diä, wo jede und jedi nume f'or sich lueget
 und versuecht, s'beschte f'or sich usez'hole.

Di menscheverachtendi Schnoddrigkei
 wo jetz vielerorts eso tue wird
 als gängs äfach drum sich durez'setze
 als gängs üs nüt aa,
 wenn Mensche weg gestoppter Entwickligshilf verhungere,
 wenn Mensche weg entfesslete Autokrate liide under Chrieg
 und Diskriminierig,
 die menschverachtendi Schnoddrigkei vum Recht vum
 Stärchere
 hät vergesse
 dass mr alli im gliiche Boot sitze
 und nume ei Welt händ.

Dr Wohlstand und d'Lebesqualität vo de westliche Welt
 basiert wesentlich druf
 dass im Abwäge vo unterschiedliche Interesse
 und im Teile vo Macht
 meh Mensche glernet händ mitenand und nid gegenand z'lebe.
 Mitenand Handel z'triibe, z'schaffe, sich usztuusche, solidarisch
 z'sii mitenand,
 und d'Mehrheit glernet hät d'Minderheite z'schütze.
 Das Rezept hett-i no so viel Luft gege obe
 What a wonderful world this would be

Mit em Blick uf di biblisch Gschicht
 gseh'mr do diä Manne im Sturm mitenand s'Boot flott z'bhalte.
 Di einte hebe s'Rueder, di andere ziehnd d'Segel ii, es paar
 schöpfe Wasser
 Si ermuntere enand und rede sich guet zue,
 Und jede packt aa, wo'ner cha
 si löse sich ab und respektiere, was jede cha biträge.

So händ si scho menge Sturm überstande.

Das isch also s'erschte, wo's mr drufaacho isch im Konf und
 überhaupt:
 um Gmeinschaft, um Solidarität, um's mitenand.
 E Variante vum Bild, dass alli im gliiche Boot sitze
 sozsäge di beschte Version devo
 isch s'Bild vo Jesus
 dass d'Mensche alli ume gliichi Tisch sitze.
 Es git kei obe und unde,
 kei Ehreplätz und Thrön und kei Arschcharte und Schandeggeli
 alli händ ihre Platz und bechömme gnueg an dem Tisch.
 Das isch s'Bild vor Gmeinschaft,
 wie'mr si im christliche Obigmohl versueche abz'bilde,
 z'erahne und z'fiire
 und wo mr üs als Chrachteheit im reale Lebe probiere deför
 iiz'setze.

Di biblisch Gschicht vor Stillig vum Seesturm
 goht debi no e Stufe tiefer.
 Si dringt in dä Bereich vor,
 wo Mensche mit all ihrem Wüsse und ihrer Kompetenz
 am End vo ihrem Latin sind.

An Bord vum Boot ir Gschicht sind immerhin 4 Manne
 wo sich mit Wind und Welle uskenne
 au mit starchem Wind und höche Welle,
 si sind scho unzähligi Nächt ufem See gsi.
 Aber jetzt sind si machtlos und voll Todesangscht.

Si werde grettet
 will Jesus, Gottes Sohn, mit an Bord isch.
 Das ergänzt d'Botschaft:
 'Mr sitze im gliiche Boot' dur d'Zuesag
Gott isch mit im Boot.
 Um das glaube z'lerne
Gott isch mit im Boot
 Um das goht's im Konf und überhaupt.
 Gott isch mit an Bord
 Gott isch Teil vo üserem Lebe.

Klar,
 jetzt muess me drüber rede
 wer Gott isch.
 D'Seesturmgschicht git en iilüchtende Aahaltspunkt.

Jesus redet ir Gschicht mit em Wind und de Welle
 wie'ner sus mit Dämone redet.
Schweig, verstumme! sait er.
 Tatsächlich symbolisiere ir Bible Welle und Wind,
 wie au Dämone
 Beidi symbolisiere di lebesfindliche Mächt,
 s'Chaos, s'Böse, das was Lebe kaput macht.

Gott isch dr Inbegriff vo de guete Mächt

das was Lebe schafft und erhaltet
 Gott isch d'Liebi
 Gott isch d'Chraft im ufblühende Frühling noch dr Winterstarri
 Gott isch was Friede stiftet.
 Gott isch dr Otem in allem, was lebt
 Und Gott isch stärcher.

Das verzellt di biblisch Gschicht.

Gott isch stärcher und Gott isch mit an Bord.

Höhepunkt vum Konfgottesdiensch isch dr Sege
 wo ihr bir Konfirmation bechömid.
Bhüeti Gott, säg-i,
 diä Churzform vor Bitt und em Zuespruch gliichziitig
 dass ihr, jedi und jede vo Euch,
 begleitet isch
 vo dene guete Mächt
 wo d'Bible Gott nennt.
 Gott isch an Bord in Euerem Lebesboot
 bi sanftem Wellegang
 und au wenn d'Welle höch gönd.

Das isch s'Verspreche und d'Hoffnig vor Konfirmation
 dass ihr als Gsegneti us dere Chille gönd.

E usführliche Version vo dem Säge chönnti si
 und dodemit schliess i diä Predigt:

***Gott, die Mutter des Lebens
segne dich.***

***Sie erfülle deine Füße mit Tanz
und deine Arme mit Kraft.***

***Er erfülle dein Herz mit Zärtlichkeit
und deine Augen mit Lachen.***

***Sie erfülle deine Ohren mit Musik
und deine Nase mit Wohlgerüchen.***

***Er stärke Dir den Rücken
und mache dich mutig und frei.***

Amen